



Dat steiht d'r in:

- Keerlke-Pries 2024
- Wi bruken Hülp
- Kinnertheater

- Platt - Bladd digitaal
- Schrievregels anerkennt
- Meta Janssen-Kucz in de Oostfreeske Landskupp

- Nümig Bastelweddstried
- Driest noch wat tolehren

Keerlke-Pries 2024



Leve Leden,

de Keerlke-Pries word utgeven an en Minske of en Institution, de besünners vööl för uns Platt daan hett. Elke Jahr blifft dat bit tolest geheem, well meent is.

De Keerlke word van 't Jahr utgeven up

**Fredag, de 15. November 2024, 19.00 Ühr, bi
Benders Gaststätte, Haarweg 3, 26446 Freborg (Friedeburg).**

Bi en mooi Programm willen wi binanner wesen un de Keerlke-Pries fieren.

Mellt Jo bitte bit **to de 7. November 2024 an unner** de Telefonnummer **04941-6981290** (maandags un dōnnerdags 8.00 bit 11.30 Ühr), per Mail unner oostfreeske.taal@ewetel.net of mit en Postkaart an Oostfreeske Taal, Postfack 1580, 26585 Auerk.

Wi freien uns düchtig, wenn Ji komen!

Beste Grōten

Hans Freese, Vōrsitter

Impressum: Platt - Bladd is en Infomationsblatt van Oostfreeske Taal, Vereen för oostfreeske Spraak un Kultur i. V. Verantwortelk för dat, wat daar insteiht: Hans Freese, Vōrsitter. Redaktion: de Vōrstand. Georgswall 1 - 5, 26603 Auerk, Tel.: 04941-6981290, oostfreeske.taal@ewetel.net. Uns Datenschuulverklaren steiht up de Webbstee www.oostfreeske-taal.de



Wi bruken jo Hülp Deiten för Platt – Lidd of Sponsor worden

Leve Leden van Oostfreeske Taal,

dreemaal in 't Jahr stüren wi jo dat Platt - Bladd mit de Nögens för de Jahresversammlung un de Keerlkefier, mit Infos van uns Vereen un ut dat Plattdüütskbüro un mit dat Sülveraadsel: „Driest noch wat tolehren“ to.

Dit is dat eerste Platt – Bladd, dat wi ok digitaal verstüren. Well uns 'n Naricht schreven un sien Mailadress stüürt hett, kriggt dat Platt - Bladd nu mit en E-Breev. Dat helpt uns, Geld för dat

Verstüren to sparen. Man wi bruken noch mehr Hülp. Uns Kösten för Veranstaltens un Verwalten stiegen un ok de Projekten worden düürder, bovendeem is de Antahl van uns Leden in de leste Jahren minner worden, umdat Ollen overleden un minn junge Lüü intreden sünd. Dat kummt irgendwann nich mehr ut. Denn können wi nich mehr all dat stönen, wat wi gern willen un wat nödig is. Ji können uns helpen, neje Leden to finnen. Geevt de Lüü dit Bladdje to lesen of stüürt hör dat to, dat se sük unner <https://oostfreeske-taal.de/platt/> in 't Internet informeren

können. Wenn se 'n bietje wieder klicken, können de Lüü daar ok futt Lidd worden. Proot ok de junge Lüü in jo Famielje un bi jo Bekannten an, dat se dat, wat ji siet Jahren mit jo Bidrag stönen, ok wiedermaken.


Wi weten, dat vööl Lüü de „Vereensmeieree“ nich gern mögen, daarom kann man bi uns ok spennen, einfach, ohn faste Plichten, eenmaal en Spenn of all Jahr en Spenn, wat för uns noch beter is. Ok dat finnen ji up uns Internetsied.

Un noch en moje

Saak: man kann ok Spennen verschenken. Wenn ji fraagt worden, wat ji to Gebuursdag of to 't Jubiläum hebben willen un ji al all hebben, wat ji bruken, können ji segen: „Geevt Oostfreeske Taal en Spenn.“ Denn sünd all hulpen, ji, jo Gasten un uns Vereen. Up Anfraag stüren wi jo ok gern en Spennenquieten, denn bedeligt sük de Fiskus villicht ok noch 'n bietje.

Wi hebben vööl bereckt in de leste Jahren, bi uns is Plattdüütsk noch en Olldagspraak.

De Vörstand van Oostfreeske Taal





Arbeitsgemeinschaft Ostfriesischer Volkstheater e.V.

Kinnertheater „Dat Märken van de twalf Maanten“

Wenn uns daaran liggt uns plattdüütske Spraak to bewahren, denn höört de in Kinnermund, so menen wi dat van de Arbeitsgemeenskupp Oostfreeske Volkstheater. Wi willen uns daarför insetten, uns plattdüütske Spraak an uns Kinner wiedertogeven. Daarum plaant de Arbeitsgemeenskupp all paar Jahr ok Kinner- un Jugendprojekten. Gliektiedig doon wi daarmit natürelk ok wat för dat Nawassfördern för uns Theaterkoppels.

Nu is dat bold weer sowied. Elv Kinner ut verscheden Dörpen proven siet Mai elke Saterdag mit vööl Spaß unner de Profiregie van Elke Münch dat plattdüütske Theaterstück „Dat Märken van de twalf Maanten“. Van Januar 2025 an geiht dat denn mit dat Theaterstück, schreven van Anette Schöneberger / Verlag för Kindertheater Weiten-dorf un Plattdüütsk oversett van Marina Bohlen, dör Oostfreesland up Tournee.

Hier de Spöölsteden:

18. un 19. Januar 2025:
26629 Timmel, Oll Karkpadd

25. un 26. Januar 2025:
26802 Oldersum, Klottjehus,
Zinngießerstrasse 4

08. Februar 2025:
26427 Esens, Theodor-Thomas-Halle,
Walpurgisstraße 12

15. Februar 2025:
26506 Norden, Osterstraße 50

22. un 23. Februar 2025:
26605 Wallinghausen, Wallinghus,
Bürgermeister Gerhard-Janssen-Straße

März 2025:
26639 Wiesmoor, Schulstraße 8

Wi fangen smaals um 15.00 Ühr an.
Kaarten gifft dat van 1. Oktober 2024 an för
5 € unner 04945 – 1666

De Arbeitsgemeenskupp Oostfreeske
Volkstheater freit sük up vööl lüttje un
grote Tokiekers!




PLATT - BLADD nu ok digitaal:

Bi uns leste Jahresversammeln hebben de Leden up Andrag van Hanne Klöver entschdedt, dat dat Platt - Bladd nu ok as PDF mit en E-Breev verstüürt worden sall. Papier hett elkeen genoeg rumliggen, un en Breev mit d' Post is ok de düürste Weg, up de uns Vereen sien Leden informeren kann. Dat is de Grund, warum wi dat Platt - Bladd nu ok digitaal anbeden doon. För de Vörstand is an nödigsten, dat all Leden de Nögen för de Jahresversammeln un för de Keerlkefier kriegen. Mit Informationen ut uns Vereen un dat Plattdüütskbüro un dat Sülvenraadsel hebben wi butendeem dreemaal in 't Jahr wat Interessantes för jo tosamenstellt un dat sall ok so blieven.

Well van jo dat Platt - Bladd nich mit de Post hebben will, de stüren wi dat Platt - Bladd mit en E-Breev to. Daarto gahn ji up de Internetsied van OT, daar hebben wi en Kontaktformular (<https://oostfreeske-taal.de/platt/kontakt/>). In de Fackjes dragen ji jo persönelke Daten in, heel wichtig is de E-Mailadress, un in de Naricht schrieven ji, dat ji dat Platt - Bladd as E-Breev hebben willen. Datenschuulverklaren an-klicken un wegstüren. Denn sparen wi un ji Geld un Papier.

De Vörstand van Oostfreeske Taal

Schrievregels anerkennt



De Begreep „Löffel“ in dat Wordenbook
(Foto: Sebastian Schatz, Oostfreeske Landskupp)

Dat Kultusministerium van Nedersassen hett de Schrievregels van de Oostfreeske Landskupp för dat oostfreesk Platt un van

Johannes Sass för Noordniedersassisk för de hele Bildungsbereich anerkennt. Daarmit kriegen de Scholen dat eerste Maal Rechtssekerheid bi dat Lehren van de plattdüütske Spraak. Dat Kultusministerium seggt avers ok, dat ok, wenn all in de Scholen nu glik schrieven sallen, all so Plattdüütsk proten un snacken düren, as se dat lehrt hebben. So blifft de Riekdoom van de Regionaalspraak lebennig. Mit disse Regel is en groot Stapp in Richtung „Plattdüütsk as Unnerrichtsfack“ daan worden. Se wiest butendeem, wo hoog dat Ansehn van de plattdüütske Spraak intüsken is.



Meta Janssen-Kucz in de Oostfreeske Landskupp



Anita Willers, Mitarbeiderske van dat Plattdüütskbüro, Elke Brückmann, Autorske van PlatinO – De Plattlehr-App, Meta Janssen-Kucz, Vizepräsidentin van de Landdag in Nedersassen, un Grietje Kammler, Baas van dat Plattdüütskbüro, up de Trappen na de Ständesaal van d' Oostfreeske Landskupp; fehlen deit Ilse Gerdes (Foto: Sebastian Schatz, Oostfreeske Landskupp)

An de 9. August weer de Vizepräsidentin van de Landdag van Nedersassen, Meta Janssen-Kucz, bi dat Plattdüütskbüro up Visiet. Dat Plattdüütskbüro stelde bi dat Treffen sien Projekten vör un vertellde, wat in de Plattdüütskmaant 2024 ansteiht.

Butendeem gung dat um dat Plattdüütsk-Hoogdüütske Online-Woordenbook www.platt-wb.de un de Plattlehr-App PlatinO. An `t Enn kreeg Froo Janssen-Kucz noch en Bült Materiaal mit to Verdelen in Hannover.

Nümig-Bastelweddstried – Jury entschiedt

Ilka Erdwiens, Leiterin des PR-Marketings der Kunsthalle Emden, Tim Bruns, Geschäftsführer der m01n digital-agentur, Grietje Kammler, Leiterin des Plattdüütskbüros der Ostfriesischen Landschaft, Jelto Müller, OTG Aufsichtsratsvorsitzender, und Imke Wemken, Geschäftsführerin der OTG (Foto: Julia Insinger, m01n digitalagentur)



In dat Prunkzimmer van de Oostfreeske Landskupp kweem an de 13. August 2024 de Jury van de Nümig-Bastelweddstried van de OTG – de Ostfriesland Tourismus GmbH – tosamen, um to kieken, well de Weddstried wunnen hett. De Baas van dat Plattdüütskbüro, Grietje Kammler, harr dat mit de anner Juryleden düchtig stuur, umdat dat 97 Insendens geev. De Deelnemers harren veer Weken Tied, de

Vörlagen - „De Nümigs“ - mit Seehund, Koh, Waddwurm, Mööv of Schaap mögelsk kreativ to gestalten. De negen Winners van de Weddstried hebben intüsken en fein Pries kregen. Hör Bidragen kann man sük up de Webstee van de OTG of in de soziale Medien ankieken.



DRIEST NOCH WAT TOLEHREN

Platt – Bladd, Utgav Oktober 2024

Wenn Ji de eerste Bookstaven van de Woorden 1 - 18 annannerhangen, kriegen Ji en Naam van en smakelk Eten rut. Dat dat wat Leckers is, kannst mit de meeste Kinner betügen (58 Sülven).

Dat sünd de Sülven: ak – an – bel – ben – bün – büüt – dig – en – ex – fin – fleit – gels – gen – ger – haaf – hook – in – je – je – jen – ken – ker – ker – kie – knak – kraat – krab – krib – küüt – led – lo – ma – mann – mood – nen – nett – nö – o – ohr – pen – per – pie – pleegs – re – schie – sel – smie – te – ten – ten – ten – ter – tum – ut – veert – ver – vör – wa (ck = kk).

Daarna word söcht:

- | | | |
|-----|--|--------|
| 01. | Büngels tüsken de Been smieten | (4 S.) |
| 02. | Daardör giffit mehr Bott in 't Huus | (2 S.) |
| 03. | Dat harrst di so docht | (4 S.) |
| 04. | De muss fröher na 't Slachten d'r her | (4 S.) |
| 05. | En Dörp in Oostfreesland, bekannt dör en trürigen Saak | (3 S.) |
| 06. | Een, de de hele Dag up de fule Huud liggt | (4 S.) |
| 07. | Well dat is, de weet wat he will | (3 S.) |
| 08. | Anner Woord för „konserven“ | (3 S.) |
| 09. | En Stadtdeel van Auerk | (2 S.) |
| 10. | Een wat unner de Nöös rieven | (3 S.) |
| 11. | De mutt sük up d' Boo am meisten knojen | (2 S.) |
| 12. | Groff Oversetten van „ansmeren, bedregen“ | (3 S.) |
| 13. | Genauer, knapper geiht dat nich | (3 S.) |
| 14. | Daar kriggst d' de harte Schill mit kött | (4 S.) |
| 15. | Daarbi is meistens een up sien Vördeel ut | (4 S.) |
| 16. | De drogen anners blot de Froolüü (Mehrtahl) | (3 S.) |
| 17. | deit selten good | (3 S.) |
| 18. | Daar kannst good van upstöten | (4 S.) |

Schrievt de Woorden up en Kaart, daar unner dat, wat rutkummt. Stüürt de Kaart an Oostfreeske Taal, Postfack 1580, 26585 Auerk. Ji können de Uplösen ok an oostfreeske.taal@ewetel.net mailen. Tied hett dat bit to **de 15. November 2024**. Unner all Insendungen word weer en Book verloost. Dat Raadsel stammt ditmaal ut Kopp un Penn van Johannes Diekhoff, de „Driest noch wat tolehren“ rutbrocht hett.

Dat spiet uns leep, dat daar twee Sülven in dat leste Raadsel vertuusket wurren. Man de meisten hebben dat uplest doch alls recht rutkregen, ok wenn daar driest noch 'n paar Uplösens mehr ingahn kunnst harren. Ofsender nich vergeten!

Ditmaal galeren wi Froo Gisela Haaken ut de Finkenstraat 6 in 51375 Leverkusen. Se is tüsken all de Uplösens utloost worden un hett dat Book wunnen. Uplösen van dat leste Sülvenraadsel: „De Tied heelt all Wunnen.“

Nu wünsken wi all Raderskes un Raders en mojen Nasömmer un en fruchtbaren Harvsttied mit 'n Bült Pläseer bi dat Utklamüüstern van de Sülven. Wenn de een of anner d'r nich mit klaarkummt, düürt se/he sük driest hören laten.

Oostfreeske Taal i. V., Auerk